

EL GARRAPIELLU

CONCEYU XENERAL – 24 OCHOBRE 2009

I. MEMORIA DE ACTIVIDADES '08-'09

Nesti añu y mediu llargu d'actividá de la Xunta Direutiva elexía n'Avientu de 2007, intentose un espoxigue xeneral de les actividaes de l'Asociación, probando estremaes llínees de trabayu, siempre dientro de los nuesos oxetivos de defensa del patrimoniu cultural asturianu y en collaboración abierta con otres asociaciones y plataformes reivindicatives.

Detallamos de seguío un resumen d'estes actividaes.

1. ESCURSIONES.

Ye a toes lluces una de les estayes de más éxitu de la organización, siempre con muncha xente onde aprovechamos la ocasión pal contactu personal, l'alderique socio-cultural y la rica gastronomía'l país.

Nesti períodu ficiéronse les siguientes escursiones:

- Marzu 2008: Escursión a Monte Areo.
- Xunetu 2008: Marcha a Cuadonga.
- Xunu 2009: Escursión a los Castros del Occidente d'Asturies.
- Xunetu 2009: Marcha a Cuadonga.
- Ochobre 2009: Escursión al Ríu Profundu con homenaxe a Rafa Balbín.

2. CONFERENCIAS.

Foi ésta una estaya de éxitu variable, con charres d'una asistencia notable y otres d'impautu más bien escasu. Dende la Direutiva, dempués de pensar detenidamente nesta actividá, entendemos qu'EL GARRAPIELLU nun pué embarcase élli solu nuna riestra de charres mensuales tal como se intentó, estaya de xuro penriba les nueses posibilidaes, si non más bien entamar charres puntuales cuando atopemos temes y ponentes d'interés. En tou casu, tamién ye meyorabe la difusión que tuvimos coles charres y el faceles xunto a otres asociaciones.

Les feches nesti períodu fueron les siguientes:

- Xineru 2008: "La Cultura del Texu", con D. Inacio Abella y xunto al "Conceyu del Texu".
- Marzu 2008: película "Asturies Paraíso Industrial" y alderique al rodiu l'agresión al patrimoniu natural asturianu. La película foi presentada por Konchi, direutora de la mesma.
- Abril 2008: "Derechu consuetudinariu asturianu", col abogáu D. Amable Concha.
- Mayu 2008: "Megalitismu n'Asturies", con D. Berto Peña, de l'Asociación Cultural Belenos.
- Avientu 2008: "La Cultura Castreña", col arqueólogu D. Alfonso Menéndez.

3. PLATAFORMES.

- **CONCEYU ABIERTU POLA OFICIALIDÁ.**
EL GARRAPIELLU fizo un destacau papel nes movilizaciones entamaes pol C.A.O. a lo llargu l'añu 2008: involucración nes asamblees, firma de convocatories, pegada cartelos, participación en marches y manifestaciones. Representaos pol nuesu compañeru Sixto Armán, presentose al C.A.O. un documentu d'autocrítica de la parálisis a la que nos taba llevando la dinámica seguía hasta'l momentu proponiendo llínees alternatives de trabayu p'abrir la xestión de la Plataforma a les asociaciones participantes y democratizando'l funcionamientu de la mesma pa involucrar la másima cantidá de xente. Esta reflexión foi rechazada pol C.A.O.
- Participación nel "**II Comité de la UNESCO para la Salvaguarda del Patrimoniu Cultural Intangible**" a través de los compañeros Anxel Nava, Sixto Armán y Ramón González, treslladaronse a Sofía. Vista la entidá d'esta estaya, a toes lluces superior al ámbitu d'una organización como EL GARRAPIELLU, propúsose una participación conxunta a varies asociaciones, propuesta rechazada polos coleutivos contactaos. La falta de collaboración del restu d'asociaciones y la censura de facto que sufre'l movimientu asturianista nos medios de comunicación, fizo qu'en gran medida nun s'aprovechara como se debiera una gran oportunidá de

reivindicar la riqueza y la defensa de la llingua asturiana. En tou casu, les crítiques nun son aplicables a EL GARRAPIELLU.

- **PLATAFORMA DE DEFENSA DEL PATRIMONIU**

Esti proyeutu foi impulsáu pol GARRAPIELLU a través del compañeru Anxel Nava con ocasión del esbarrumbe de los horros de San Andrés de los Estacones (Xixón). La denuncia fecha pol GARRAPIELLU del derribu los horros tuvo gran impactu en prensa. La idea de la Platorma ye axuntar delles organizaciones de defensa del patrimoniu cultural nun conceyu permanente de vixilancia y denuncia de les agresiones que, tristemente, sabemos van producise de xuro tolos años.

- **PLATAFORMA DE DEFENSA D'ABAMIA y CONCEYU DEL TEXU,** Febreru de 2008, actu sofitáu pol GARRAPIELLU, con gran presencia de socios y gran ésitu nun sólo en participación de xente si non tamién nel impautu en medios y reacciones de l'Alministración, que llegó a reconocer que les coses nun s'habíen fecho como debieren y punxo en marcha un decálogu pales actividaes de restauración. Les barbariaes feches n'Abamia, sin embargo, a día de güei siguen como taben.

4. CONCURSOS.

- **CONCURSU DE CUENTOS CURTIOS.**

Dende la Directiva entendemos qu'ésta ye una de les actividaes señeres del GARRAPIELLU con lo que diose-y continuidá a lo llargo d'estos dos años. El prósimu premiu tá previstu entregalu el prósimu 11 de payares.

- **CONCURSU DE REDAICIÓN D'ESCOLINOS.**

Tuvo llugar nel últimu trimestre del cursu 2008-2009, con entrega de premios en xunu de 2009. Como tantes vegaes, fallonos la collaboración de la prensa pal asoleyamientu de les redaiciones ganadores. Tamién queremos dexar afitáu'l sofitu del Real Sporting de Xixón, dionos de baldre les dos entraes, pa la neña ganadora, del últimu partíu de la cabera temporada cuando yera verdaderamente mui difícil algamar una por otu mediu.

5. DEPORTE TRADICIONAL.

Coordinada por Sabel Tuñón y Carlos Suari, foi la estaya de más actividá y trabayu nesti períodu, amás d'atropar idees y proyectos perinteresantes pal añu que vien.

- **Esibiciones de Deporte Tradicional:** cola coordinación de Sabel Tuñón, nos años 2008 y 2009 ficieronse 19 esibiciones de Deporte Tradicional, tanto en fiestes parroquiales del branu como n'actos de calter diversu. Capítulu aparte merez el puestu que se tuvo estos años en MERCAPLANA, con gran ésitu de visites.
- **Títulu de Monitor de Deporte Tradicional,** estaya perambiciosa impulsada por Sabel Tuñón y Carlos Suari y llevada a cabo con gran ésitu n'ochobre-payares 2008: 21 persones obtuvieron el primer títulu de Monitor de Deporte Tradicional que se da n'Asturies. Dende equí queremos agradecer al Ayuntamientu de Xixón el sofitu prestau coles instalaciones del Muséu Etnográficu del Pueblu d'Asturies y la collaboración nel Títulu entregau a los asistentes.

6. OTRES ACTIVIDAES.

- **SAN PEDRO LA COLLÁ.**
Ye esta una estaya que de vegada en vegada va xuntando menos xente y con un conteníu más difusu. Debemos facer ente tós una reflexón conxunta sobro'l sentíu que tién seguir diendo a la llesia y con qué obxetu.
- **RUTA DEL ROMÁNICU.**
Actividá conxunta con la Asociación de Vecinos de La Calzada que se lleva faciendo ya 2 años. La idea ye difundir y reivindicar un patrimonio tan olvidau como'l Románicu Xixonés. Vuelve facese esti añu los próximos 7 y 14 de payares.

II. ANÁLISIS FINANCIERU

Balance del año 2008: Entamase'l año con una caixa de 1849,82 €

Ingresos

Ingresos socios	2.600,00 €
Ingresos subvenciones	200,00 €
Ingresos actividades	424,55 €
Ingresos financieros	14,14 €
Total	3.238,69 €

Gastos

Funcionamiento	- 2.155,39 €
Financieros	-108,23 €
Dietes	-730,00 €
Varios	-1.110,00 €
Total	-4.103,62 €

Balance -864,93 €

Balance del año 2009: Entamase'l año con una caixa de 613,15 €

Ingresos

Ingresos socios	110,00 €
Ingresos subvenciones	350,00 €
Ingresos actividades	6.345,32 €
Ingresos financieros	0,23 €
Total	6.805,55 €

Gastos

Funcionamiento	-938,87 €
Financieros	-53,07 €
Dietes	-3.015,60 €
Varios	
Total	-4.007,54 €

Balance 2.798,01 €

Anguaño'l saldu de la caixa ye de 3.411,16 €.

III. VALORACION DENDE LA DIREUTIVA

Dende la Direutiva facemos un balance encontrau d'esti añu y mediu al cargu de la coordinación de l'actividá de l'Asociación. Foi un camín entamáu con enfotu y munches ganés de trabayar y nel que facemos agora un altu pa reflexionar xunto al restu de socios. Atopamos lluces y solombres, coses que consideramos positives y otres qu'apaecen como estayes a meyorar.

... DE LES LLUCES

Nesti períodu algamose cola collaboración de toos una consolidación de l'Asociación y de la so actividá, puntu especialmente valoratible por mor del momentu tan baxu que vive l'asociacionismu sociu-cultural en xeneral y l'asturianista en particular. De formes diverses, alcanzamos la treintena de socios que d'una manera u otra tuvieron presentes na vida del GARRAPIELLU nestos últimos meses, cifra notoriamente alta y qu'obliga a la próxima Xunta Direutiva a facese cargu del desafíu de meyorar el nivel d'actividá y l'impautu de l'Asociación na sociedá asturiana.

Organizose dende l'entamu una manera de xestionar l'actividá más descentralizada y abierta, que permitiere la participación direuta de los socios nel trabayu de l'Asociación. Nesti sen tomaronse les decisiones siguientes:

- Abrieronse los conceyos de la Direutiva a tolos socios que nos facilitaren l'e-mail.
- Comunicose vía correu periódicamente'l balance de l'actividá de l'Asociación y planes de trabayu a futuru invitando a la participación de los socios.
- Les diferentes estayes organizáronse como grupos autónomos de trabayu embaxo la coordinación d'un sociu y la participación abierta a quien quisiera.

... DE LES SOLOMBRES

Si per un llau valoramos como positivu'l nivel de actividá y participación alcanzau, per otru tenemos que ser conscientes que'l númberu de socios habitualmente activos malpenes algama la docena, cifra que nun mos permite poner en marcha del modu adecuau toles estayes planificaes. Dende la Direutiva somos conscientes que munches vegáes nun dimos colos planes de trabayu nin colos calces de participación afayadizos. ¿Qué faltó? ¿Qué pudo habese fecho d'otru modu? ¿Cómo podemos aumentar el númberu de socios involucraos y por tantu'l nivel d'actividá y el nuesu impautu social?

A pesar d'habelo intentao y d'haber trabayao en delles plataformes unitaries o n'andecha con otres asociaciones en proyeutos puntuales, nun s'algamó facer una rellación fluída y habitual col restu l'asociacionismu cultural y reivindicativu n'Asturies. Si bien ye cierto y tristemente palpable'l momentu de parálisis que vive'l mundiu sociu-cultural asturianista, nun por eso debemos dexar de facer la necesaria autocrítica y tratar no que mos cinque de recuperar la unidá d'aición y les sinerxes ente asociaciones siempre que seya posible.

Y queda pendiente uua de los eternos problemes del mundo asturianista: la censura que de facto sufrimos dende la prensa mayoritaria. Ye bien triste comprobar día a día ensin equivocase nos pronósticos cómo cualquier escritu unviáu n'asturianu queda perdíu y non apaez espublizáu enxamás. Da qué pensar que les dos cartes y un comunicáu que sí se enviaron a la prensa en castellano apaecieron publicaos rápido y ensin torgues. Si bien esti ye una circunstancia de mayor ámbitu que'l que pué manexar EL GARRAPIELLU, esta direutiva queda cola sensación de que les coses puen facese meyor nun futuru, quicibes a través de un trabayu personal más cercanu a los medios, solos y xunto a otres asociaciones cuando seya posible, intentando face-yos ver que nun ye ciertu'l prexuciu que quier colocar a la llingua asturiana na marxinalidá de la cultura d'esti país.

IV. PROPUESTA ACTIVIDAD 2010

¿SER O NO SER?

Como se comentara tantas veces y ya s'apuntó nesti documentu, tócanos vivir unos tiempos de desmovilización social, unos tiempos marcaos fonderamente pola ideoloxía del individualismu, el consumismu y la priesa. To ello agravao pol entreguismo cultural que caracteriza a la sociedá asturiana d'anguaño, a la que se-y quier imponer la resignación ante la supresión de la so llingua del terren de lo políticamente correutu y el so encierru no "folklórico".

Nesti contestu de crisis del asociacionismu sociu-cultural en xeneral y asturianista en particular y de total abandonu pola Alministración Asturiana de les señes culturales más básiques d'esti país, cabe entrugase pol sentíu que tien EL GARRAPIELLU. Y la respuesta que dende la Direutiva damos ye unánime y firme: son toes estes circunstancies les que mos obliguen a seguir nel camín, consciente qu'anguaño ye precisamente nel asociacionismu onde vive de modu más intensu la brega pola defensa de la cultura asturiana, una cultura asturiana non excluyente si non parte enriquecedora ya integrante de la cultura d'Humanidá.

Tamién queremos convidar a los socios a retomar el trabayu na Asociación, dende la perceición de que somos necesarios tolos que tamos nun proyeutu que tien sentíu.

PAL AÑU 2010...

Dende la Directiva queremos abrir l'Asamblea a un alderique de l'actividá fecha que mos sirva pa definir qué *idegues* tienen de caltenese, qué ye meyor camudar, qué nueves ides s'aporten polos socios y con qué xente pué cuntase y en qué coses.

Serán ideas básiques de la nuesa actividá atopar y meyorar una participación abierta a los socios nel día a día de l' Asociación, asina como buscar siempre la

collaboración de los medios de comunicación mayoritarios siempre que seya posible y el trabayu conxuntu col restu d'asociaciones que tan na nuesa estaya. Les desilusiones que tuvimos con ocasión de les propuestes presentaes al C.A.O. o cola Asamblea de la U.N.E.S.C.O. nun deben enxamás facer de nos una asociación más que vive nel so mundiu particular, si non buscar el meyor camín pa tender pontes na Sociedá viva.

Na idea de trabayar no posible cola Alministración amás d'escontra d'ella cuando seya necesario, de l'Asamblea saldráse con un documentu de propuestes pa ser presentáu a la Conceyalía de Cultura del Ayuntamientu de Xixón y a los grupos políticos con representación municipal, amás de la Consejería de Cultura del Principau d'Asturies.

Dende equí queremos señalar la celebración de los 20 años de vida d'EL GARRAPIELLU como'l aglutinante de l'actividá del añu entrante, estos 20 años tienen de servinos pa reivindicar cola máxima notorieda l'actividá d'EL GARRAPIELLU nesti tiempu, una actividá que ye tan necesaria agora como fai 20 años: la defensa de la llingua, del patrimoni cultural asturianu material e inmaterial y de la nuesa riqueza natural.